



Sarajevo, 03. april 2020. godine

POZIV NA AKCIJU PROTIV EKONOMSKE KRIZE

Poštovani sugrađani,

nalazimo se u vanrednoj situaciji čiji su ishod i vrijeme okončanja još uvijek vrlo neizvjesni. Suočavamo se sa zdravstvenom krizom koja ugrožava živote mnogih naših sugrađana. Stručnjaci iz oblasti zdravstva svakodnevno daju upute kojih se moramo pridržavati kako bi se počeo nazirati kraj ove krize, uz što manji broj žrtava.

Nažalost, ova primarno zdravstvena kriza za sobom povlači i ekonomsku krizu čije posljedice još uvijek ni vodeći svjetski ekonomisti ne mogu u potpunosti sagledati. Sve ekonomije svijeta se nalaze u ogromnim problemima, a mnoge industrije kao turizam ili transport suočene su sa skoro potpunom obustavom aktivnosti. Za mnoge privredne subjekte ovo je nažalost kraj!

No, bez obzira na nesagledive ekonomske razmjere ove krize i po Bosnu i Hercegovinu, kao vodeći ekonomski fakultet želimo dobrim primjerom pokazati da se sve institucije, svaka iz svoje perspektive, mogu i trebaju uključiti u suzbijanje negativnih posljedica. Ta borba se može voditi i na nivou pojedinca, i zbog toga pozivamo i vas da se uključite u borbu protiv ekonomske krize i već sada date vlastiti doprinos oporavku naše privrede.

A vaš doprinos je vrlo jednostavan. Sa ciljem što manjeg kretanja van kuće, preporuke stručnjaka su da se što rijeđe odlazi u kupovinu namirnica, te da se u tim prorijeđenim kupovinama nabave svi proizvodi koji će vam trebati do slijedeće kupovine. **I upravo tu možete dati značajan doprinos.**

Naime, prilikom kupovine proizvoda u trgovinama pozivamo vas da vodite računa o kupovini proizvoda koji su proizvedeni na teritoriji Bosne i Hercegovine. Privrednici naše zemlje su u poslijeratnom periodu naporno radili kako bi proširili ponudu proizvoda koji se kod nas proizvode. Posebno u oblasti higijene i prehrane. Pored toga, uložili su značajne finansijske, ljudske i tehnološke napore kako bi podigli kvalitet svojih proizvoda, te sa zadovoljstvom možemo konstatovati kako su u tome uveliko i uspjeli. Zbog tih napora danas imamo širok asortiman raznih proizvoda koje svakodnevno koristimo a koji su proizvedeni u Bosni i Hercegovini.

Kupovinom upravo tih proizvoda dajete dvostruk doprinos borbi protiv ekonomske krize.

Prvo, kupovinom i potrošnjom domaćih proizvoda pomažete da se sačuvaju radna mjesta – naših članova porodice, prijatelja, komšija.

Drugo, kupovinom domaćih proizvoda pomažete i punjenje državnog budžeta, te time osiguravate penzije ljudi koji su izgradili ovo što danas kao društvo imamo, školarine za mlade generacije, te plate među kojima su posebno značajne plate medicinskog osoblja koje ovih dana rizikuju svoje živote kako bi nas i naše najmilije zaštitili od opakog virusa.

Dragi sugrađani, kupovinom proizvoda koji su proizvedeni na teritoriji Bosne i Hercegovine ne samo da dajete značajan finansijski doprinos oporavku naše privrede, već i pokazujete visok stepen



odgovornosti prema društvu, te zahvalnost onima koji se trenutno na više frontova bore da se naši životi u što je moguće većoj mjeri dalje nesmetano odvijaju.

Borba protiv korona virusa je dvojaka. Borba za zdravlje, kroz ostanak kući. I borba za radna mjesta, kroz kupovinu domaćih proizvoda!

Ostanite što više kući, a kada kupujete, kupujte domaće!

Ekonomski fakultet u Sarajevu